

# E Kölsch ABC-Leedche

vum Volker Hein  
(Melodie: Es steht ein Wirtshaus an der Lahn)



Die **Aap**, dat is e juxich Dier  
Och **Blootwoosch** mäht uns vill Pläsier  
Ne **Clown**, dä is nit allzick jeck  
Dä **Dom** is unser bestes Stöck

Dä loße mer in Kö-ö-lle!

En **Entefott** de Muul nor schwaad  
En **Fleeg** sitz op d'r Appeltaat  
Ne **Gummibüggel** wärmp d'r Liev  
Ne **Hibbelepip** weed späder stiev

Mer wolle dat nie wä-ä-de!

Ne **Imi** is keine Kölsche nit  
Ne **Jömerpott** de Begovung kritt.  
En **Krad** moss keine Schlächte sin  
En de **Lappekess** kruffe mer ovens erin

Un dun vun morje dr-äu-äu-me!

Ne **Mömmes** trick mer us d'r Nas  
Ne **Nüggel** es för kleine Quös  
En **Ovvenspief** is leich verstopp.  
Mer kölsche **Pänz** sin immer god drop.

Do künnt ehr noch von l-ie-ie-hre!

Ne **Quetschbüggel** mäht Musik  
E **Ringeldüvj**e brengk et Glück.  
En't **Sackdoch** mer et Näsche schnuv  
En **Tachtel** deiht su wieh wie en Juv.

Dröm sin mer och dog-ä-ä-ge!

En **Uuzerei** is en löstige Saach.  
De **Vüggelcher** fleute om Daach  
Manch **wölle Wöötche** mer noch nit bejriev  
En **Xanthipp**, dat es e jeftig Wiew,

Nor jot, dat mer kein k-e-e-nne!

Mit **Ypsilon** fängk kei Wöötche an  
God, wann mer **Zaus** em Kessel han  
Vun A bis Z he in däm Fall –  
No es am Engk dä jecke Kall

Dreimol Alaaf dä kölsche Klaaf.

